

Гури Рахманова

БУЛАХ

Библиотека дагестанского
школьника



ББК 84(2-Агул.)-5
УДК 821.531
Р-27

Рахманова Г.

Р-27 Булах: Шагьирар, эхтилатар, хIикаятар. – Махач-
кала: ГАУ РД «Дагестанское книжное издательство»,
2020. – 64 с.

Рахманова Г. Родник: Стихи, рассказы, сказки.


Шиирар, ахтилатарна, хIикатар ликлиная агъуларин шаирди,
ликлиная ги юрклураъастти, мертти, батларди. Гафарар ликлиная бицли
шиниккварис гебури ацлун иджевелар акъурай пуна, батларди ухътан-
ди дуяйил руцурай пуна.

ББК 84(2-Агул.)-5
УДК 821.531

Р $\frac{4803180201 - 46}{М 123 - 2020}$ 63 - 2020

ISBN 978-5-297-02147-1

© Рахманова Г., 2020
© Дагестанское
книжное
издательство, 2020



Школьникдус

Багаймикес дахи гъайиш,
Зарядкабур акъас алиш,
Гъиларна хъюси мертт акъе,
Мактабиди вес яхІ акъе.

Устулихъ батІарди укъе,
Гъали вас ухшарде мукъе.
Ве гъилар сад сайил алихъ,
Ве магъалимдил хъеб алихъ.

Темпелвелар акъай макъа,
Дарсар хурас даккан макъа.
Бавахъ хъае бицІи масан
Хъурай вакес идже инсан.

Вун дарсар хуруна кканде,
Вун хІя хъеф са пишал кканде,
ХІяттари пеф гІакъул хъурай,
Вун ватанис панагъ хъурай.

Хъе хІукумат

Ери багус улер ат,
Хъаси вун гъел гъаламат.
Лихуна хъе махлукъат,
Удихъ шуни хІукумат.

Гъилари акъа курар
Хъаржуран але ттурар,
Ихъуна тукун худар
Машинари акъая.

Завал акъай инсанар,
Алихъай гъава хулар,
дуканар, хура усар
ухътан вея шагъурар.

ШкольниКарис

Зурбабур вей мактаби.
Рагъ тІагарис ичина
Багаймикес дахиди,
Хулал нур аличине.

Са гагъра гъатдушуна,
Че кючаяр ацІуни.
Сад сайихъай лихъуна
Джала мактаби шуни.

Гъиларив тукар фая,
ГӀюнери китабар а,
Рушарив фи фурс фая,
Варил цӀае кунар ал.

Хъюхъе гӀулер ушун
БицӀиттар фараш акъай.
Гъел цӀулин вахтт адини
Хураттар завал акъай.

Зе Агъул

Агъуларин гӀунеяр
Са ул ярхӀяс ккандийхи.
Ражгади гъузу сувар
Серин акъас ккандийхи.

ЧӀираригӀ гӀяе тукар,
Чаб фи ухътанди ахи.
Улусумарин джилар,
Чаб фи ширинди ахи.

АгӀуларин жегъилар
ЧӀирар суман агъдирай.
Гъар усан бицӀи хӀулар
Чун вари бахтлу хъурай.

Хьид адини

Ми дуньягъ пашманди ай,
ЧЮме хьуна угъай ай.
Раккахъди хьид адинай,
Цаде хьуна лайкунай.

Къизил рагъ завулди шав,
Ери багус нур ичас.
Инсанарис бахтт фашав,
ЮркIвар муради фацас.

Гюнейрис ярхIю улер,
Ухътан велди ацIая.
Хьеттарин хьуна хулер,
Жагвар ибхьер уцIая.

Фи махIталди гъузунай
Сифттан назукде тукар.
Шавгъар ярхIяй ттуттунай
Тукарин бицIи цIабар.

МагIалимар

Шиниккварис э вун гIалим,
Усттулихъ хъае магIалим.
Вахттарилди дарсар ахай,
ИцIая вун гIакъул лазим.

Хурунде жарахІис суман,
ЯгІай ли вас гъардан дарман.
КІилихъ гъузай, бурмиш акъай,
Гъарттикес акъай вун инсан.

Дарсар йиттарин гъунерар
Агвая хъуна мунерар.
Фи шад вея ги вахттуни
Зегъмет лихъу магІалимар.

ДахІал

Рагъ суварихъ хъархъуна
КетІусуни ягъ.
Ахъ джиллди лархъуна
Фацуни че багъ.

Къапуйрихъ хъа хъайина
ХІюппарин убад.
Гебурин джилар хъуна,
Хъуни ккелар шад.

ДахІал адиф, нахчирар
Дарас ярхІюни.
Фачадивуна хярар,
ТагІди гъархъуни.

Гуш адина экъуни,
Гъел ккиркІуфи ягъ.
Ваз гІикІуна угуни –
Гушарин чирагъ!

ГІюл

Ери багу хъибу цІаб але гІуькІер,
Фи шатти лухъая чвел гъазе чуквер.
Лепе атай гъузу хуппурин экІер,
Уцуна ахаси чун хъасти мекІер.

Фи ухътани туку фацунде кІурар!
КІилди даракк ккетІуна гІакъве нулар.
КІурарин кІеникк кке зибзарин хулар
Агъ, фи зурбади лихъунай а цилар!

Хярарил алурцая уъттерин ниъ.
ТагІди хъикай лухас фачучІая иъ.
ЮркІв джакъв суман аттишая мухуриъ –
Гъамишттин гъунерар хъа хъе гІюлерихъ.

МахІтал хъуна гъузуна ая чайлах,
Агвай суван лаве дурухІяй булах.
ГІушахъди ваз вея хІядарихъ матахІ,
КиркІвас акъая ягъ акъуна кутахІ.

Гъамштити хъурай

Бавари ухІя малар,
Шадвелдис кьисмат хъурай.
Дадари ухІя хІюппар,
Хулас хазина хъурай.

Гъилари лихъу хулар,
Къала хъуна гъузурай.
Ччиччарихъ хъае ччуччар,
Ччиппикес далда хъурай.

Хулакк ккие халича
Сусар руцай цІурурай,
ХІюрарин исал кюча
КІиркІар руцай ацІурай.

БицІи хІюрарин гимар
Маджлис акъай илгурай.
Гим ацІунде идемар
Ватан ухІяс сагъ хъурай.

Цул адини

Цул адиндеф, пяжара хъюхъе хъуна гъузуни,
Кеттахъай дарарикес, чаб чиппилди кехъуни.
Къюрдихъас акъай хиял, гъабгъарин тІурф угая,
Тиреби ттуттас акъай, даран кІуларар рукъкъая.

Цулин аяз таґІдикий учІая хІаятари,
АцІая джил пѣжари-кѣизилдин манатарѣ.
Уѣстт атай адаркая муулар але тѣреб,
Хулар, хазинайриккди керхѣай чугая силѣб.

Сад сайхѣай, гІазиз хѣуна, зурзай ая зулзумар,
Сувар пашманди ая, гулуна улусумар.
Арсуран хулер хѣуна, нецІвар лавѣй амѣя,
Чуллѣ дифи фацуна, кѣярхѣу хуппур амѣя.

Нахчирарин убадар гѣава заву рухая,
Хярарил алихѣуна цулин рангар ахая.
Инсанари файѣна ккиркІуная махІсулар,
Иджи хІазурди кѣюрдис, ацІуна ая хулар.

Ватан

Багѣа э чес дадан ватан,
Ери багу сувар ухѣтан.
Адахи вун суманф сара,
Лурцучира дунѣял пара.

ХІюрари маслигІат ая,
Че инсанар кардик кея.
Шадвел акѣай, дард пай акѣай
Че халкѣар а суван гѣавай.

Багѣа э чес бицІи хІюрар,
Гѣар дерейри хѣуна кІунтІар.
Багѣа э чес руг ватанин,
Мезураллѣ чІал дадарин.

Ибхьер але гъава сувар,
ХІюппар экъвайде укунар, –
Чун агуф юркІв вєя ачух,
Улер ацІуна вєя тух.

Угъал

Парзайрилди чукІуна,
Къирийри акъуни кецІ.
Мялле угъал угъуна,
Дерей хІалак хъуни нецІв.

Угъундеф къизил угъал,
Гъазе чирар элхъюни.
Назук кІилар гъагъдивай,
Хъюхъе тукар лехъуни.

ГІуччая сувар, галар
Мяртте хеттан хулери.
ЦІае акъаяджилар
Ги угъалин гъилари.

Угъалис яваш агъай,
КъирийгІяс рагъ гІягъдини.
Зе ватан ухътан акъай,
Чес рагъухъан лихъуни.

Аяз – ХІядаг

Варха ракъкъярис адиф,
Учихъай жикал файиф,
Гъава сувалас латтиф,
Жагвар къапуйрис аттиф.

Аяз-ХІядад рукъуни,
Дуйикес рукъ акъуни,
Джиларил ибхъ лахъуни,
Къюрди раккар дахъуни.

Аяз-ХІядад рукъуни,
Дарарив ибхъ фахъуни,
Жикалис устт ярхІюни,
Ракъкъяр цІуппе акъуни.

Че хІюристи ладини,
Учин мужур ттуттуни,
Че тагарив фукъуни,
Ухътан накъиш атуни.

Тагъди хъуни хаб лакул,
Алихъуни меркв нецІул,
ЯрхІюни хуларис ул,
Алчихъуни учин ккул.

Хьид

КетІуни майдан чуллар,
Рагъ ярхІюна дерейрис.
Киркъуни рагъун нурар,
Хьид адина дарарис.

Дегиш акъуна кунар,
Суй гъазиди гъузуні.
Рагъу уцІуна мерквар,
НецІв гъарай фай лашуни.

Хуларин къирагъарик
Цугъцугъаяр уцІая.
Нахчирарин джилари
Гъава завар ацІая.

Жагвар ибхьер хъед хъуна,
Джиларисти ушуни.
Гъаги хеттар ухуна,
Гъазе чирар тІушуни.

ГІуш

Алчихъуна гІуша лит,
Ягъ даркуни учихъди.
Ягъун рангар хъуна къит,
Агъшуни хІадарихъди.

Гџуша шавгъар ярхџюна,
Дахъяс акъуни джилар.
Учин гџунис ярхџюна,
Гъархъяс акъуни хулар.

Кџилди къуват лихъуна,
Угая аџџунде ваз.
Нур нуралахъ хъихъуна,
Лавея джилилди лаз.

Гџюлана

Гџюлерихъай, гџюлер ккандий –
Кџидиркџвай рагъар.
Гџюлин мялле угъал ккандий –
Арсуран маргъар.

Ладахъай џџантукар хъурай,
Адаџџай улер.
Гъазе џџирин чуллар хъурай,
Булахар-хулер!

Мяртте рухар алашурай,
Гъургъай мурадар.
Нахчирари дар аџџурай,
Ухъяй веледар!

Рагъун нулар ппара хъурай –
Къизилдин улер!
Ери рангу джил фацурай –
Гюлерин гюнел!


Якьу чи

Якьу гелай са иса
Либасар дегиш акъай,
Якьу чи а гъамиса
Сад сайи хIалак акъай.

Сад вея хъес ибхьер фай,
НецIварил мерквар лихъай.
Сайи вея тукар фай,
Гъазе хараяр ккихъай.

Гидин хуппахъ вей сайи,
Хъес куче рагъар ахай.
Якьудпеф вей са тагъди,
Емишин хумча ахай.

Гъаме ччиччар фушари
Сад сайс ухшар дааттар?
Мур са баван рушари,
Амма сауса адаттар.



Клур-клур

Хьуне агъай, хьундава агъай, са Клур-клур. Клилин ягъди учихъас дала фикир акъай адава агъай ме. Фикир акъая агъай ме – уч фишттин глакъулдин нахчир ийчин.

Цайила гъурагъалдис адатухлела фикир акъая ме: «Фидехлен бицлела уйи зун! Ппара гелди кканди, да-хиди хлаф хъас!»

Гелди, гелди – хлаф хъуная ме. Хаб фикир акъуная ме: «Фидехлен ухътанф хъуная зун! Фи ире кулагъар ая зе гарданди! Фи ухътан рудж хъая захъ!»

Гъагъдивуна клилра, са дамах фай аруцая ме хлаяти, садра сеймиш кидавай. Пеглер, ккеккер къацлра гъучатай ада ме учин багу. Гъагъдивуна хярара хъуккая ме гебурихъ. Учи- учикес фикир акъая ме:

«Вуй, фидехлен гуджлу э зун, зурба э зун!» Ппара бахилди ая Клур-клур уч, учил. Са ягъариккес, са ягъа фацуная ми аессий руккас. Иджи яккра ке агъай мидик. Яглар хъуная Клур-клурис уч руккаф, ярхлюная ми цлар. Фаттархъуна аессин гъиларифас гъишиная ме дарасте. Яглар хъуна адава Клур-клурис, дараъ учихъ Сул-глагай гъузуна аеф.

Сул-гІагайи фацуная ме, акьуная учис батІар ямак. ЙирхІай учин мууларис мезра пуная Сула: «Агъ, КІур-кІур, КІур-кІур, вас ппара курар ягІай ий, амма ве якк фидехІен ширинф ийчин, вас ягІай адавуйи!»

Балугъбай

Хьуная са нецІугІ Балугъбай. НецІв ппара мерттеф ий хьуная, иджи ай хьуная мисаъ Балугъбайис.

Сагелай агуная Балугъбайис нецІун къирагъиъ са щейъ эьуна. Гьучашуная ме, гьаги щейъунафас хабар гьушуная:

– Вун фуш э?

– Зун Гитан э, – пуная гьаги щейъуни.

– Фи вас кканеф? – пуна, суал йиная Балугъбайи мис.

– Мич гьучашаб сара, – пуная Гитани. – Зун вас агъаси фи ийчин зас кканеф.

Гьучадиная Балугъбай нецІун къирагъиди, Гитани-ра йирхІуна пандж, фацуная ми. ЮркІв аттархьуная Балугъбайин гучІ хьуна. Аттішиная ме хаб нецІугІди, амма са хяр кеттархьуная мин, илгуная Гитанин панджарив.

– Агъ, – пуная ме, – фи Іае щейъ э нецІун багулив фаеф!

Ушуна хулади, пуная ме сайи балугъарис, учил фи кар алчархьуна айчин.

– Вун ппара гъургъас кканеф э, – пуная мис сайи балугъари. – ДахІела э вун фацас хъеф!

Са вахттарилас хъагуная ме Балугъбайис нецІун багу сасра шейъ. Гъучашуная ме, хабар гъушуная:

– Фуш э вун?

– Зун Къаз э, – пуная Къазала.

– Вуй, – пуная Балугъбайи – фидехІен батІарфи вун!

– Гъучашаб зе багуди, – пуная Къазала. – Зун иджи агвас вас.

Гъучашуная Балугъбай мин багуди, Къазалара йирхІуна муул фацуная Балугъбай.

– КІея! КІея! – агъай цІар атуная Балугъбайи.

Къазалафас фаттархъуная Балугъбай, амма са ул алайшуная мин. Адиная ме хулади, ахъакъуная учин дард сайи балугъарис.

– Я, кІили са фера адаваф! – пуная мис сайи балугъари, – фидехІен пуни чин вас магъургъа!

Завал хъуная джала балугъар фикир акъас, фишттин гІемал аттивас вейчуг акъас ме Балугъбайис. Гъар балугъи учин фикир пуная. Сай пуная:

– Шаб ли хъин нецІун кІени атас!

Сайиди пуная:

– Шаб мис хъин фацай гІалеф хай акъас!


– Ваъ, – пуная ке ХІа балугъи – Ке идже гІемал зас ягІай а!

– Фи гІемал э? – пуна гучІ хъуная хъе Балугъбайис. Уч кІе суман хъуная мис.

– Гъургъас ккан хъухІела, вун ве сиви хъед фаце! – пуная ке ХІа балугъи.

Гъати вахттунилас мич, инсанарисра дагъургъас, сиви хъед фаце пунаеф э!

ІУлна Чаркв



Хьуная агъай дуйил са бицІи ІУл. Сатти ай хьуная ме, садра хъудавай. Учин мугуйъ аттучІай, учІай гъатай хьуная ме вахттар, ягъар. Сагелай са ягІа алчархьуная мис ХІурчал. Са шатти ай агуная бицІи ІУлус ми ХІурчал.

– Фас лидехІен шатти аеф э вун? – пуна, хабар гъушуная бицІи ІУлу.

Іаламат хьуная ХІурчал. Учисра дахІай хьуная гис, уч фас шатти аеф ийчин.

– Найич вееф э вун? – хъупуная мис бицІи ІУлу.

– Зун зе дусттунин багуди вееф э, – пуная ХІурчали.

– Фуш э ве дустт? – пуна, хабар гъушуная бицІи ІУлу.

– Зе дустт сасра ХІурчали, – пуная ми ХІурчали, – ги гъами багулив фае хяра аеф э.

Пуна гъагисттира, гулуная ХІурчал бицІи ІУлун удигъас. Фикирара акъай илгуная ІУл. «Фас эгъан ? – пуная ми, – захъ хъудаеф дустт?»

Архьуная мин юркІура, учисра айчуг акъас са дустт. Атуна учин мугра, ушуная ми рекъкъди-рекъкъди.

Са арайилас алчархьуная мис пегІелан Чаркв.

– Найич вееф э вун? – пуна хабар гъушуная Чарквала ІУлуфас.

– Зун зас дустт айчуг акъас веэф э, – пуная ІУлу. – Вахъ хъай ава дустт?

– Ваъ, – пуная Чарквала – захъ са баб э хъайеф. Засра кканде дустт ачуг акъас вес.

– Шаб захъай, – пуная мис ІУлу.

Ушуная мебур рекъкъди-рекъкъди. Рекъкъери ахъ-акъуная мебури чиппи чиппис гъар журан эхттилата-ра.

Эл кеттушуная мебурин, алдамиш хъуна сад сайил. Са арайилас заварил алурцай агуная мебурис Пази. Гъел фикъаси? ГучІ йирхъуная мебурис.

– Дахи, дахи! Джин ухІуна кканди хъин! – пуная ІУлу.

– Мич вес, мич вес! – пуная Чарквала, – Джин ухъас парун цІабалакк!

Іудра джинухъуная мебур, чаб Пазийс дагвас, парун цІабалакк. Латтушуная Пази сасра багулди. Шад хъуная ІУлна Чаркв. Хъушуная мебур рекъкъди-рекъкъди. Алчархъуная мебурис булах. Фиштти латтучІа-се гъал? Чарквала пуная ІУлус:

– Зе лекар цІуппеттар э. Вун алекъ зал, зун вун алаттахасе булахилас. Лекъуна алаттафайшуная ІУл Чарквала. Хъушуная мебур рекъкъди-рекъкъди, акъай эхттилатара, ладурфай ухътан чІирарилас, ту-карилас.

Са вахттуналас вее мучІе, найич вейчира ягІар вей адавуь мебурис. МучІи хъегуна пегІелан Чарквалас са фера хъагвай адавуь агъай. ПегІерисра, гъагебурин чаркварисра са фера хъагвафтавуь мучІе вес фачучІухІела. Гъал фикъасе?

– Вас гучІ мева, – пуная ІУлу. – Зун ве багулив фая. Фаце зе рудж, зун вун ахасе са сакин мукъуйи.

Фацуная Чарквала ІУлун рудж, файшуная ІУлу ме са тІурфун ккенаккди. Чаркв гъархъуная, ІУлушуная чиппис багаймис гІалеттар хас. Фас пичин, Іуларис Іушира са иджи агваф э.

Багаймикес Чаркв кетІасти, мин багулив фая агъай са ацІуна кьуран ударар. Шад хъуная ме. Ме шад хъеф, ІУлла шад хъуная. Багайминттара акьуна, шатти-шатти вей хъуная мебур рекъкъди-рекъкъди. Алчархъуная мебурис гъати ХІурчал. ХІурчали хабар гъушуная мебурифас:

– Чун найич вееттар э?

– Чин вееф э дусттар ачуг акъас, – пуная мебури.


– Я, ахІмакъар, – пуная мебурис ХІурчали – чун лагъа фи идже дусттар хъуна айчин. Шатти-шатти, фи иджи агвай а зас чун!

ГІаламат хъуная ІУлна Чаркв. Ийра ий хъуная ХІурчали пеф дуз – Іудара шатти ай хъуная мебур, бахилди чаб чиппил.

– Кканди андава зас руцас сасра дустталахъас, – пуная ІУлу.

– Засра андава ккандий, – пуная Чарквала, – Ке идже дустт вун э зас!

Гъагиштти цІуппе дусттар хъуная ІУлукесна Чарквалакес.



Губахъан

Са багъди айхъуная бицIи Губахъан. Ий хъуная ме Губахъан са куц алдаваф, тIурари ацIуф, учра са шургеф, къяшуф. Амма уч бицIидиъ ай, дахIяй хъуная мис уч фишттинф ийчин.

Багъ са ухътанф ий хъуная, гъарджуран кIурари, тIурфари, тукари ацIуф. Ме Губахъандис ке кканеттар ий хъуная тукар, батIарвелди ул ацIаттар.

Улара атай батIар тукарис, гIядаркай хъуная ме багъдигI. Тукари хабар гIушуная мифас:

– Вун фуш э?

– Зас ягIайдава, зун фуш ийчин, – пуная Губахъанди.

– Айчин, – пуная тукари, – вунна са тук хъурай чегI гIаейде!

– Хъурай! – пуная Губахъанди.

Гъар ягъа гIядаркая ме гъами багъдигI, юркIв лучIуная мин гъарджуран тукарил. Тукарин юркIарис ме Губахъанна ппара ккан хъуная, фас печин, гебурин юркIара чаб суман батIарттар ийхъуная.

Тукар гIутIас адихIела милехъвар, къоницабур, ме Губахъанди гебур чаб гIутIай хъуная. Фидехъен шад вей хъуная ги вахттуни тукар. Турттанди чиппин батIар цIабара, акъай хъуная ми тукари Губахъандис мегIнибур. Губахъандин улар ацIуная иджвелин нур

ярхІуна. Са ягІа адиная ме багъдистти Джакъв, агу-
ная мис ГІубахъан.

– Я ГІубахъан, – пуная Джакъвала – фас э ве улари
гъалидехІен нур ицІай аеф?

– ЯгІайдава зас, – пуная ГІубахъанди.

Тамаши хъуная Джакъв ГІубахъандил. Джакъвала
гІутанди хъуная варти кІурарик, тІурфарик кие кьо-
ницабур, цІабрухъанар.

ГІубахъанди цІабрухъанарик кедархІай хъуная,
фас печин, гебура тукарис ухшарди ае хІела.


Сагелай фацай цІабрухъанар, аттархъуная ме ба-
гІдисти са гед. Хъадурфуная ме садпуна ГІубахъан-
дис, хаб пуная:


– Вуй, фи чІирхІе зад э вун! Гул хъуна ях мидас!

ГІубахъан мехІтал хъуная, ушуна джинухъуная ме
тукаригІ. Айчира ме гедайи къуттар фаттатуная мил-
ди, гІашуная ГІубахъан. «Фасегъан, – пуна фикир
акъуная ме, – зун мидехІен чІирхІеф?»

– МагІаша, магІаша! – пуная мис тукари, – вун ке
батІарфи чегІ гІаеф!

Айчира юркІурас гиран хъуная ГІубахъандин, гучІ
гъархъуная мис инсанаргъас. Гъате вахттунин хаб уч
дагвас инсанарис, гІуши дала аттвей хъуна адава ме.





Багниш

Са мучІе дараъ ай хъуная са азман Багниш. Вари вахІши хІейванарис гучІай хъуная ме Багнишигъас.

Ме Багнишин джил керкъу вахттуні, мебур цІал-цІал хъуна гъишай хъуная. Багниш учис рахІатди адаркай хъуная дараъ, са фиттикесра хабар кедавуї. Уч паччагъ суман хъуная мис ми даран, шад вей мухур атай хъуная ме учин гъиларилди, лихъуна кІилди дарал вагІра, бувра. Хъара къяїи гучІ вей хъуная вахІши хІейванарис, гин джил унудухъас чиппис, гъишай хъуная мебур вархайристи.

Са ягъариккес, са ягъа усуная ме Багнишин лекун кІени заз. ФидехІен алучІучира, аттивас хъуна адава мифас ги заз. ГІур акъай кехас вей адавуї агъай Багнишивас, був йирхІуная ме.

МехІтал хъуная дарагІ гІяе веxІши хІейванар, фи эгъан пуная акъуна аеф Багнишис. Багнишис ягъра, гІушра хъагуна адава гІурдин гъили, фаттархъуна джиллиди, гІашай хъуная ме.

– Идже хъуная! – пуная Суле, – зун агвас атай адавуї гъагиди!

– Дарман хъуная! – пуная ХІуча, – Уч дала адавуї суман аяї Багнишис гъаме дараъ.

– ГІашурай! ГІашурай! – пуная ГІюра. Зе чарквар гучІай кІей ай лидигъас.

Сайисра кканди адавуї хъуная Багниш, язукъкъ хъуна адавуї ме мебурис.

Факъа гъел Багниши? Удай, удай учин лекра, глашая ме, амма заз фишттира аттархъай адавуй.

Завулас мич вее нахчирис унихъая мин джил. Гламат хъуная бицIи Джакъв, фас эгъан пуная ме Багниш глашаеф? Аладиная ме кIуранин кIукIустти, хъадурфуная фи ийчугас акъуф Багнишис.

– Фи вас акъуф? – пуна, хабар гIушуная ме.

– Зун кIея леку гIур акъай! – пуная Багниши. – Зе леку заз усуная!

– Гламаша, гламаша – пуная Джакъвала, – зун аттиваси ве заз.

Сакин хъуная Багниш, амма леку ае гIур яваш вей адавуй агъай.

– Гъучмева! Гъалиди вун гIутIанасе! – пуная Джакъвалас вахIши хIейванари.

– Ваъ, – пуная Джакъвала, – зе юркIуравас ккехас хъастава мис кумак дакъуна.

Аттивуная агъай ми зурба Джакъвала азман Багнишин лекус заз!

Са рахIат хъуная Багнишис.

– Агъ, – пуная ме, са бицIи заз ийчира леку аеф, амма гIур аркъай ий са цIахун усу суман!

Гъал гIашуная Багниш шад хъуна, ява- явашти лашуная мин улериас негъвар.

– Фас гIашаф э гъал вун? – пуна, хабар гIушуная мифас Джакъвала.

– Зун гIашаеф э, – пуная Багниши, – зас ягIар хъу-гуна зун фидехIен къаеф ийчин, вун фидехIен иджеф ийчин.

– Гъал вунна иджеф ухъ, – пуная Джакъвала Багнишис.

– Хъурай, – пуная ме.

Гъати вахттунилас мич, иджвел архъуная Багнишин юркІура. Сайисра гиран хъакъуна адавуй ме. ВахІши хІейванарисра ккан хъуная ме, гучІра киндай хъуная мебурис Багнишагъас. Багнишисра ягІархъуная сатти уч сафира даваф, ке бицІи Джакъвалакес кумак хъехІела учис. Гъагиштти инсанара э. ЮркІуран хІавел акъай руцаттар, ахир кІилис алчархъаеф э са чиппис сеймиш кидайде инсандил!

Кролик на ГІюр

Са хІурин багулив дар фай хъуная. Гъаме дарагІ ацІуна вахІши хІейванар гІай хъуная. Фиштти ийчира хъуна, гъами дарасти аттархъуная са Кролик. Кроликдин кІилистти адиная фикир, гъами дарагІ экъвас, джала вахІши хІейванарихъ хъай. Са чІалалди, ухътанди агуная Кроликдис ми мукъ.

Са арайилас найи усас адифийчира ягІайдавуй, гъучадиная мин удигъди ГІюр.

– Вун фиштти аттархъуфи дарасти? – пуна, суал йиная ГІюра.

– Зун кегъатІуная хула, – пуная Кроликди, – гъал зас дараъ экъвас кканди ая.

– Иджи агъая вун, – пуная ГІюра, – ппара ухътанф э че дар, гІалеттара ацІуная. Фи батІар кІурар айчин

че дара! Фи ппара манзил айчин адаркас! Шаб зун вас
че дар агор акъас!

Адаркая мебур дара, ГЮора таГрифар акъай къацІ
сив алакъай адава агъай. Са арайилас унвея мебурис
кІуранин кутІуларин джил.

– Дахи джинухъ! Дахи джинухъ! – агъас дала хъу-
чархъуна адавуй ГЮор.

Адина ХІуча гІутІуная ми касиб. Кролик улара
алакъуна учис ХІуч дагвас, джинди экъуная чІибя-
рин тІурфаригІ гІучІуна. Дар сакин хъехІала, гучІай-
гучІай са яваштти гІаттадиная ме дарагІас. ГІатта-
дифна сад са гъуккай- гъуккай адиная ме хулади, уч
училас ушуна. «Ваъ, – пуная ми, – зас гъами хулаъ
иджи э, инсанарин багу сакинди, гъати ухътан дараъ
дала хІутте силевар ае ХІуч ае.»

Са Паччагъихъас

Хъуна агъай, хъундава агъай са Паччагъ. Хъая агъай
михъ ацІунан девлет: къизилари ацІу сундукъар, ар-
суран къабар, ке багъан халичабур. Са чІалалди, хъу-
дава щейъ адава агъай михъ.

Учин юркІурас кканегъилди ушуная мин гІуммур.
Амма са касиб инсандисра кумак, хІурмет акъас юр-
кІура мусра хъуна адава гъами Паччагъин. Вей, вей
Іуссе хъуная ме, иттар хъуная ме.

Унархъас акъае ме Паччагъи идже-идже духтура-
рис, жарахІарис. Акъуна кканди ая мис гебури учис
са чара.

Мебури мис гъилин дарманара акъая, сайи дарма-
нара акъая, амма ме Паччагъ сагІ вей адавуй.

Гъал ппара гучІ вей Паччагъис уч кІес, унархъас
акъая ми учин багу са хІа гІалимис.

Ме гІалими агъая:

– КІеста вун, эгер ке бахтавар инсандин берхІем
аликІучи ве жандил.

Шад вей Паччагъ, учин вакиларис агъая ми, фа-
шаб пуна учин удигъди ке бахтавар инсан. Ваки-
лар гъаги сегІетди алучІая руцас ке бахтавар инсан-
дихъас. Ппара аруцая мебур, амма гъар инсандихъ
учин дерди хъай вей. Гъал фи э акъаф? Паччагъис
вей, вей къайи вей.

Сагелай са вакилис, фиштти ийчира алчархъуна
агвая кІуранин кІенакк фушийчира гъархъуна, аху-
нигІас элхъенди. КетІас акъая вакили ме касиб инсан:

– Я, инсан, гъайиш! Вун фуш э? Вас ккане-дакканф
ава са фера?

– Адава. Са фера зас кканеф адава, – агъая ми ин-
санди. – Варттал чулле зав, кІенакк гъазе чІир, багу-
лив гъарджуран тукар. Фи зас сара кканеф?

– Вун батІарди фикир акъе, – пуная вакили, – са
фийиичира ккандий адавуй хъасттава вас.

– Са фера ккандавуй, са фера, – агъая ми инсанди.

– Айчин, – пуная вакили, – шаб захъай Паччагъин
багу.

– Фи э зун гъагисаъ акъаф? – пуна, суал йиная инсанди ме вакилис.

– Шаб, шаб, вас ацІуна къизилар ицІаси Паччагъи, – пуна, гуджинас ахая учихъай вакили ме касиб инсан.

Ппара шад вея Паччагъ ме инсан агухІела.

– Дахиди, дахиди ве берхІем тин зас! – агъая ме касибис.

– БерхІем фикъафи? – пуна, гІаламат вея ми инсан.

ХІулакди ай, хІулакди ай, чІалла хъудапуна ме касибис, Паччагъин вакили дивуна латтивая мил але куртка. Амма агвая мебурис: курткин кенаккес са щейтъра алдавай касибил. Гъаги уч але усал юркІв гъузуна кІея ме Паччагъ.

ХІабабна хуттул

Умуксум бицІи хуттул э ГІайиша-хІабабан. Умуксуман пеша э агъай кІилин ягъди учин ХІабабас суалар йиб. ГІайиша-хІабабас Умуксум ппара ккандий а, гъар са суалис атІу жуваб йицІай ги хуттулин. Сагелай хабар гъушая Умуксума учин ХІабабафас:

– Фи э гъати заву ае рагъ, ХІабаб?

– Гъати, ХІабабан, къизилдин ттупп э, амма шиниквар кегърукъафтава, дурхІясра гъушунас вефтава.

– Я, ХІабаб – пуна, сара суалла хъуйицІая Умуксума. – Фи э гІуш?

– ГІуш, зе руш – агъая ГІайиша-хІабаба, – кІаре хІейвани, рагъ фучІугуна, гІуш вея хъе кючайрилас, хуппурилас, хярарилас, та багайм вестехІен.

Багаймикес ккеккер рухухІела, гІуш учин хуласти хъушуна гъархъаеф э, ширин ахун акъай. Сасра гелай йицІая Умуксума ХІабабас суал:

– Я, ХІабаб, хІул фи э?


– ХІул, зе руш, чулле-чулле шагъурари мертте хъеттарин, ги шагъурар балугъаринттар э, зе руш.

Сагелай хабар гъушуная Умуксума:


– Зун фуш э, я ХІабаб?

– Вун зе руш, Умуксум э. Вун че бицІи чаркв э. Путтар – акъаф, йиттар – гІалеф, учин дадар, бабарил хъеб алихъаф, ХІабабас ке ппара кканеф. ЮркІв шад хъуная рушан, учин ХІабаба мебур пегуна. Умуксума суалар йицІая, ГІайиша-хІабаба жувабар йицІая. Мебур кьюдара чаб-чиппил ппара разиди ая.

Латтушуная вахттар, Умуксумакес ппара ухътан руш хъуная, мактабра ккиркІуная ме. Джиларихъасра, заварихъасра, хІулерихъасра ппара ягІархъуная мис. Амма учин ХІабабан чІалар мусра кІвалас вейдава мин.



Кантіна Капур



Сагелай ихъуная хІуджатар Кантіалана Капури.
Капури пуная:

– ФидехІен кьуват хъайчин захъ! Зун нур ицІа
рукъандинф э! Зе мурзар лап Іайи хІутеттар э! Зун ке
зурба э дуйил але!

– Зунна рукъандинф э, – пуная Кантіала – зе мур-
зара хІутеттар э! Зун инсанарис ппара герек вей валас!

– Зун ппара герек вей! – пуная Капури. – Зун са-
фиттигъасра дагучІай девгіий вей, душманар къир-
миш акъас!

– Инсанди зун ппара гъили гъушая вун дала! –
агъая Кантіала, – гъелбетки, зун иджи э! Зун ппара
герек вей, вун дала!

Гъамиштти акъая мебури лихъуна хІуджатар, къа-
цІра ккедайхъай. Гъами вахттунди гъаттвей гъамурин
багулифас са Іуссе къуджа.

– Я къуджа, – агъая Капури, – Вун са хІа инсан
э, са хубжи исара хъуная ве, са ацІунан курара ал-
чархъуная вал. Уп гъал час, фуш ийчин чакес ппара
инсандис герекди аеф. Капур эва, дахъичин Канті эва?

Гъузуная ме къуджа фикир акъай, хаб пуная:

– Ми джилин варттал инсандис ппара герек
вей Канті гъар са кардис, ги ппара гъушая ин-
санди гъили. Амма, инсан ухІаеф душманарик-
кес Капури э. Сагелай гъили гъушучира, Капури

кІилди гІуммурдин ккие хайир ицІая инсандис. Къуджай миштти пеф, ккиркІвай а хІуджат мебурин.

Дагийхъас

Сагелай Даги гъархъуная хъай учин Къёнчра ширин эмкІерикра кий. ЭмкІерикес агвая мис чаб чІираригІ гІяруцай, гъарджуран тукар, чІирар гІутанде. Учин Къёнчра агвая мис дурухІай багулив.

Адина къерекъелди кетІас акъая ме:

– Я, Даги! Я, Даги! Вас унархъая, цІакІинаригІди шаб агъая!

Дагий улар дахъая, амма уч але мукъуйлас тІушанде адавуй ме. Мин бицІи Къёнч шад вея, гъагъархъая лекул.


– Шаб, шаб, дахиди! – агъая ми. – Шаб цІакІинаригІди вес!

ТІушай адава Даги фишттира уч але мукъуйилас.

– Шаб, шаб, – агъай хъаттархъай адавуй Къёнч. – Хъин лехъунара акъаси, мегІнибура акъаси. Шаб сара вес!

– Агъ, вун, бицІи ахІмакъ, – пуная Дагий. – Мус агуная вас, дагийрис лехъунар акъас, мегІнибур акъас унархъуна цІакІинаригІди? Гъагебурис фийичира я хъед гъас кканди аеф э зал алихъуна, я кІурар гъас.

Цив-цивай



Хъуная ПегѠлахъ са бицѠи чарквар. ГебуригѠ гѠай хъуная Цив- цивай агъа чарквра. Са фиттикесра хабар кедавуй хъуная Цив-цивас, мехѠелди лап бицѠи амий хъуная ме. Айчира гѠутѠанде хъуная ме ширин кашабур рухѠу къурарин, бицѠи милехъор, ударар гъар чѠирарин. Агъас ягѠай хъуная ме чарквалас Іаре: «Цив-цив». Сайи чаркварихъ хъай гъуккай- гъуккай вей а ме хъихъина учин бабахъ – ПегѠлахъ. Сагелай кѠунтѠакес верехѠела, лурцай-лурцай дагъуная ме, ПегѠеласра къацѠра дагуна.

КѠил алурцуна, улар мучѠе хъуна фаттархъуная ме чѠирилди. КѠиф суман хъуная Цив-цивас уч.

Сасрайлас улер дахъастти, агуна мис учин варттал са азман сив, са азман джагвар силебар айеф. ГучѠ хъуна кѠиная ме. Гъал фиэ акъаф? ЯгѠархъуна адава Цив- цивас гъаме Уърге идеф.

– Вун фуш э? – пуна, хабар гъушуная мифас Уъргей са батѠар ширин джил акъуна.

Цив-циван гучѠ гулуная, мидехѠен батѠар джил аеф къяйе щейъ фишттира хъастта пуная ме.

– Зун Цив-цивай э, – пуная ме.

– Вун нандиъ аеф э? – хабар гъушуная Уъргей.

– ЯгѠяйдава зас, – пуная ме, – зун бабахъас хъаттархъуна гулу гъава э.

– Гъел фикъасе? – пуна, хабар гъушуная Уъргей мифас.

Гъаги вахттуни Уъргейис унархъуная учин баба, гъахъишиная ми учин бабан багу. Сатти илгуная Цив-цИвай. Хъадурфуная ме: завуъ хъюхъе рагъ агуная мис, жилиъ гъазе чІирар, ухътан тукар агуная мис.

– Агъ, – пуная ми, – фи ухътанфе гъами дунья!

Джакъвар агуная мис заваритъ мегІнибур акъай, цІабрухъянар агуная мис са тукарилас сайи тукарил алурцай.

Са ЦІабрухъян лап багулив фае тукул экъуная. Са явашди гъучашуная мин багу Цив-цИвай.

– Вун нахчир эва? – пуна, суал йиная ме.

– Дава! – пуная ЦІабрухъянди, – зун ЦІабрухъян э. Хъадурф, фидехІен батІар цІабар кияф ийчи зак! Пуна гъагишттира, гъишиная ЦІабрухъян.

«Фиштти э ме вееф? – фикир акъая Цив-цИвайи – завулас вея, хярара кия, амма нахчир даваф?»

Вей, вей, хъуная мучІи. Джинухъуная ме са тІурфарин кІенакк. Садпуна кІил гъагъдивасти, агвая мис учин варттал, са ккутІулик кІил адихъ акъуна ккехъунагъай сад. ГІаламат хъуная ме.

– Вун фуш э? – пуна суал йиная ме. – Джакъв эва?

– Ваъ, дава, – пуная ккутІуликес. – Зун Каргахил э, хярар кие Іули. Амма зун джакъв суман завулас верефе.

– Фиштти вун джакъв даваф? – пуная Цив-цИвайи, – хярар вакк кия, завулас вун вея.

Каргахила пуная:

– Завулас вередехІенттар нахчирар дава. ЧукІер, тІутІар, варвар – гъамебур заварилас вереттари, амма джакъвар дава.

– Вун нахчир эва? – пуна, суал йиная ме Каргахилас.

– Ваъ, вун нахчир э. – пуная Каргахила. – Амма вун ПегІелан чаркв э, чун заварилас вереттар дава. Сасра нахчирара ая дунъяил заварилас даветтар. Гебурис агъафе: страусар, кивибур, пингвинар.

– Гъел фиштти э зас ягІархъаф найи ийчин нахчир, найи даайчин? – пуна, суал йиная ме Каргахилас.

– Джала нахчирари мегІнибур акъафе, – пуная Каргахила мис.

«Нахчирари мегІнибур акъафе, нахчирари мегІнибур акъафе,» – агъай фикир акъай ахун алчашуная ЦІив-цІивас.

Улар дахъасти, хъуная агъай багайм. ИбгІиди рагъра адиная агъай, джакъварира мегІнибур акъая агъай.

Гъуккай-гъуккай ушуная ЦІив-цІивай нецІун багуливди, агуная мис са ухътан гъазе щейъ мегІнибур акъа. Шад хъуная ме.

– Вун нахчир эва? – пуна, йиная ме суал.

– Ква! Ква! – пуная ме щейъуна-Зун ГІуби! Фасе вун зас нахчир пеф?

– Вун мегІнибур акъахІела-пуная ЦІив-цІивайи.

– Нахчирихъ гІурагІалар верефе, – пуная ГІубала – Гъагебурихъ мугар верефе.

ГІуччуна учин муулара, улара, ушуная ме руцас учин бабахъас, ччиччар, ччуччарихъас.

Алчархъуная мис рекъкъю муг, жагвар бицІи гъурагъалар айедеф.

– Гъами фи нахчирин муг э, – пуная ме.

– Гъами че муг э, – пуная, жуваб йиная мис зибзари. Чин нахчирар дава, чин зибзар э, нахчирар пурцІар кееттар э!

«ПурцІар кееттар, пурцІар кееттар» – агъай гъишина ушуная мидас ЦІив-цІивай.

– Фи вун сатти аеф? – пуная мис садпуна заварилас.

Хъадурфуная ме, агуная мис Джакъв. Хярара кия агъай, завуласра вея агъай, пурцІара ал агъай.

– Вун нахчир эва? – пуна, суал йиная ми.

– Э, зун нахчир э, – пуная Джакъвала – Зас Джакъв агъафе.

– Вун нандиъ аеф э?

– Зун гулуна аеф э. – пуная ЦІив-цІива.

– Шаб – пуная Джакъвала, – зун вун рекъкъюл акъасе.

Акъуная Джакъвала ЦІив-цІивай рякъкъюл, та хулахъди дехъен.


– Баб, баб! – пуная ми хІулакди-хІулакди, ПегІ агуйса учис, – Зун нахчир эва?

– Э, бабан, э! – пуная ПегІела мис шад хъуна, учин чаркв агуна.

– Нахъуни ийчин зе пурцІар? – пуная ЦІив-цІивайи.

– ПурцІара хъасе, бабан! Хъасе, бабан! – пуна хъай учин чарквра шатти-шатти хъушуная ПегІ учин сайи чаркварин багу.

Урч



Гурдана салаъ хуруная ХІунийс Урч. Гин азман уларис сагІетис са фера агвай адавуй, гІудул ибурарис са фера унихъай адавуйи. Учин бабан удигъ гІузуная ме зурзанде, зурзанде икке лекарил, гІудул мускеларил.

– Фи, ухътан бицІиф хуруная хъе ХІунийс! – пуная ПегІела.

БицІиф, хІакъикъат, ухътанф ий хъуная. Уч буреф, абаъ жагвар тук айеф, кІаре азман улар айеф, уларихъ ирхе цІипцІипар хъаеф.

– Фи, ухътанф э! Фи, ухътанф э! – пуная сайи ПегІелара, Ккеккелара.

Амма ХІуний са чІалла пуна адавуй, фачучІуная ми учин Урч гІуччанас. Атай мез, гІашкъунаса гІудулди, чІичІ-чІичІахъай гІуччанде ХІуний учин кІиркІ. Ппара ухътанде агвай мебур ми вахттуна. ФидехІен кканевел агор акъая баба учин Урчурас. Атай мез, атай мез, мертт акъай гин къяшу хам ХІуний. Урч ахуник киеф суман амия, улар алихъай бабан мез ширин акъай.

– ФидехІен иджи э! – пуная ПегІела, Урч лекул гъузуна учин бабан неkk ухахІела.

– Учи неkkра ухая гъа! – пуная сайи ПегІела – Хъин кІилин вазала гъурагъаларил экъвая сагелай, хаб гъурагъалариас аттатунае хІелара хъе чаркварис батІарди хъуланде кканди ая.

ХІуний кьацІ унихъаеф суман адавуї са фера, учин Урчурал бяхилдиъ ай некк йиная бицІиттис. Урчу-
ранна ХІунина юркІвар ме сагІати кканевелди фацу-
ная. Мебурис садра я агвайра адавуїи, я унихъайра
адавуїи чиппилас гъайри. Гъамидис мегъе агъаф э ке
азман Бахтт.

КІарни

Са ччира, са ччура ай хъуная паркунаъ дурхІелар
акъай чаб чиппихъай. Сад пуна унихъай а мебурис са
тамашин джил.

– Амир! Амир! – пуная ччиччий учин ччуччуйис.
– Вас унихъай ава?

– Унихъая, Зейнаб – пуная ччуччуй мис.

Ушуная мебур джилихъди, джил вей хъуная са кІу-
ранин кІенаккес. Хуттурфасти агуная мебурис са би-
цІи кІаре курцІул. Паркунаъ инсанар андай хъуная,
гъал навас э хабар гъушаф мебури?

– Шаб хъин ми хъе хула хас, – пуная Амира.

– Шаб, – пуная Зейнаба. – Сара фикъай хъин мис?

Файшуная мебури курцІул хулади, йиная неккра,
гунира. КурцІули са гучІай-гучІай гІутІуная, улара
кеттатай мебурккди.

– Гъамин ттур фуш эгъан? – пуная Амира.

– Шаб хъин гъамидис КІарни агъас, – пуная Зейна-
ба – гъали кІареф идехІела.

Алихъуная мебури мил КІарни. Хула дадана баба
мебурис пуная:

– Чун мугъаят ухъ. Белки са инсан руцай аеф э хъасе гъали курцѳулихъас.

Сайи ягъа файшуная Амирана, Зейнаба ме курцѳул паркуниди. Амма са инсанра гъучадина адава мебу-рин багуди. Ахира атас чиппис пуна маслигѳат акъу-ная мебури. Батѳарди хъуланди ая мебур Кѳарнийхъ. Идже гѳалеттара ицѳая мебури мис, рагѳалалди чѳичѳра жирхая мин, кючайристира аттахая ме.

Кѳарни вей, вей хъатѳуная мебурихъ, дурхѳай гъу-зая гъамебур агухѳела. Амиранна, Зейнабанна ппа-ра гѳашкъ лучѳуная ми курцѳулил. Са ягъариккес, са ягъа мебур кючай аехѳела, са руша унархъая курцѳу-лисра хъадурфай:

– Пупсик! Пупсик! Вун нандиъ уйи? Шаб зе багуди!

Амма Кѳарни къацѳра ке хъадурфай адава агъай ме рушахъ.

Гъучадиная ме руш Амиранна, Зейнабан удигътти, пуная:

– Гъаме зе курцѳул э, Пупсик. Че кючайас гулун-деф э. Чин руцай фачахъадархъаеф ий гъами.

Гѳашас кканхъуная Амирасна, Зейнабас гъами вахттуна, курцѳул ес кканди адавуйи мебурис рушас.

Руша пуная:

– Зе ттур Анжела э, зун гъати жагвар хуларитъ аеф э. Вей акъе зе курцѳулихъай дурхѳяс.

– Баркаллагъ! – пуная Амира. – Чин магъа ме ху-лаъ аеттари.

Агор акъуная Амира чиппин хулар Анжелайис.

Гъушуная Анжелайи Кѳарни, ушуная чиппин ху-лади. Амма Кѳарнийс къацѳра кандий адавуй вес ме рушахъай, лихъуная курцѳули цѳугѳ.

Са къяйи язукъкъ хъуная КІарни Амирасна, Зейнабас. Ушуна чиппин хулади гІашуная мебур дадафасна бабафас сакин акъас давей.

Хъуная гІуш, амма шиникквар гъархъай адава, гебурин юркІвари КІарни а ягъди. КІарнира къацІра сакин хъуна адавуй, кІилин гІуштти цІугІ лихъуна гІашай хъуная ми Амирахъасна, Зейнабахъас.

Ахира пуная Анжелайин баба учин рушас:

– Миштти хъастава. Ппара язукъкъ хъуни зас ми курцІул. Фай ях ми, хаб тин гъати гедавна рушав. Тур ппара кандия мис.

Багаймикес са дахи сай са хІулакди-хІулакди раkk йирхІуная Амиранна, Зейнабан хулан. ГучІ хъуная мебурин хуланттарис, дахиди ушуна дада дахъуная раkk.

Ракк дахъуфна сад, ачархъуная цІугІ лихъуна хулади КІарни, йиная Амиранна, Зейнабан хъясебурис мез. Са арайилас Анжелара агуная мебурис, мехІтал хъуна раkкакк гъузунае.

– Ачашаб, зе руш, – пуная мебурин баба Анжелайис.

– Ваъ, зас къана вея, – пуная Анжелайи. – Гъали курцІул чвес хъурайи зе багулиас.

– Агъ, баркалагъ, зе руш, – пуная мебурин баба. – Ма айчин че багулиас васра гъушен, – пуна йиная Анжелайис чиппин игрушкаде чІичІин гитан.

Шад хъуная Анжела, элхъенди ушуная ме чиппин хулади фай гитанра.

Амирна, Зейнаб дурхІяй КІарнийхъай шатти элхъенди экъуная чиппин хулаъ.

ХІуни



Са аессихъ хъай хъуная са идже ХІуни. Са батІар-ди некра киеф, са хІа урчара веф. ГІашкъ алдий ухІаяме ми ХІуни. Гъар гІулана батІар гъазе гІукІера акъай а ме аессий учин ХІунийс, са чувал къура рухІуна хІазур акъая мис.

Амма са хъид мекІилф, чІумеф хъуна, хъаттархъуная ме аессин гІукІер. Рукъкъу сумар амий хъуная. Гъал фи э акъаф ХІунийс ми аессий? Сумар къацІра кканхъуна адавуи ХІунийс, дагІутІай эхъуная ме.

Ягъ, ягъалас яхун вей, кеттушуная ХІуни. Дард хъуная мин аессийсра, амма фикъайчин дахІай хъуная мис. Гъами хІуриъ айхъуная са зарафатар кие идеми. Ми идемий пуная ХІунин аессийс:

– Зас ягІай фиштти сумар гІутІанас алихъайчин ве ХІуни.

ГІаламат хъуная аесси:

– Фиштти э? – пуна хабар гъушуная ми идемийфас.

– Зас са бадра ччем йичин, агъаси зун, – пуная ми.

Гъел фи э акъаф? Бадра ччемра язукъди а ми идемийс ицІас, амма учин сала ае малла язукъди а мис кІес. Ахира рази хъуна, йиная ми бадра ччем ми идемийс. Ми идемий фикъуная? Адиная ми ХІунин аессин саласти, аттивуная джибиниас гъазе хІангвар ае гІейнабур.

– Ма, – пуная ми, – аликі ве ХІунил гъамебур, гъазиди агвас гис ве хъюхъе сумар. Аликіуная аессий

ХІунил ме гІейнабур. Са арайилас фачучІуни агъай
ХІуни гІутІанас сумар са ширинди-ширинди, хияли
вас мебур гъал файинае гъазе гІукІер э пуна.

Шад хъуная аесси. Хъара шад хъуная идеми, учис
кІилин бадра ччемра гІелди экъуная хъидин вахттуна.

Пул

Хъуная агъай, хъуна адава агъай са касиб инсан.
Фера хъадава агъай михъ, са Іуссе хІейван дала. ХІей-
ванивас кар акъас аттуркъай андава агъай, аессийва-
сра аттуркъай андава агъай. Гъел фи э акъаф? Ушуна
базаристи маса йиная ме учин хІейван, пулра фай ади-
ная ме хулади. ГучІай а мис гъал, пул нандиъ джин
акъайчин ягІяй адавуи мис. Нандис э ягІярхъефра,
пулар къацІра мусра хъадавуи инсандис?

Акъуная, акъуная фикирар, ахир кІил кканхъу-
ная мис ми пул джилиди икІас, са инсандисра фача-
дархъас. Ми касибин къумши пулар хъаеф ий хъуная,
амма уч са къяйи къис-къис ийхъуная. ГІуммурди са
инсандисра иджвел кидаваф ийхъуная ме. Ушуная ме
касиб учин багъдисти, дагвахилди къумшийс гІушан
йикъяни рукІуна джил, йикІуная ми пулар. Амма
къумшин тІагар хъаеф ий хъуная мебурин багухъди,
унихъуна бералан джил, хъикІинай хъуная ме.

Са вахттарилас ме касибис герек вея пул. РукІучи джил – андава агъай пул! Жагвар хъуная мин хъясин ранг! Гъел фикъасе? Нан э пул вереф?

ЯгІархъуная мис фиййчира къумшин кар идеф. Гъал фикъая ми касибѳ Сайи ягъа агъая ми учин къумшийс:

– Валлагъ, биллагъ гъами зе багъди пул аеф ий йикІуна джили. Гъал багагъ гІуши зун хъара пулар ахъикасе гъагебуригІди. Вун къумши зас рукІас ку-мак акъе.

– Хъурай сара, – пуная къумший.

Амма учи фикир акъая агъай, гъами пулара хъат-тикІес касибин. Дахи, дахи ягІа гІуши ахъикІая къумший учи аттиву пулар касибин багъдин джили, хуп-пай хъай сайи пулара гъахъушасе пуна.

Ги ахъикІуна амий, касибѳ атхъудивай а учин пул джилиас. Ушуна сайи ягъа базари, гъушая ми учис кър, хІур.

ГІушахъди вея мин багуди къумши, агъая мис:

– Шаб, хъин ве пулар джин акъас!

– Зун зе пулар ягІа ачатуне агъая касибѳ.

Дахи, дахи мучІе гІуш хъегуна, адина рукІай а къум-ший касибин багъдин джил, учи ахъикІу пул гъахъу-шас. Амма сафера андавуѳ агвая мисаъ мис.



Рагъухъандин хIуттесар

Айхъуная са хIуриъ авалдин вахттуна касиб хиза-
нар. Дад шумарар акъай маса йицIаф ий хъуная, баб
хулан курар акъай экъуф ий хъуная. Гебурихъ хъай
хъуная са кIиркI, бицIи амий хъуная ме, ягъди ду-
рухIас кканде ай хъуная мис. Са ягъариккес са ягъа
баба пуная кIиркIас:

– Жан, бабан, гъел вун хIа хъуная. Хъе дадасра ку-
мак кканде ая, фихъучира акъас хулан кар яхI акъай
акъе.

– Хъурай, баб, – пуная кIиркIа.

Сагелай ушуная ме кIиркI даради кIурар гъас.
Адина къирийри фацуна зав, ичина цIалп, угъуная
угъал.

Ме кIиркI джинихъуная дарадин экъванигI. Угъал
киркIухIела гIаттадинаа ме дарагIас.

Фи ухътанди агвай ая агъай кIиркIас ми дуньягъ.
КъирибуригIас рагъу учин къизил нулар ичая, гъа-
зе чIирар, тукар элхъенди ая хъеттарин тинкIарил
бахилди. Амма ке ухътанди аргой ая мис ери ран-
гун рагъухъан, даран багулив мугI хъуна лихъунаеф.
КIол вея кIиркIан баба агъаф гъар гелан рагъухъан
агвахIела: «Рагъухъандин кIенакк къизилдин хIутте-
сар ккеефе.»

Гьуккай, гьуккай вея ме рагъухъандин кІенаккди, фачархъая мис гьал къизилдин хІуттесар.

Шад вея ми, агъая учи учис:

– Гьал чин касибди илгостава! Зе хІуттесари фикъайчуг гьал!

Ми хІуттесарис агъая ме:

– Час цІае халла атІ, цІае хулас цІае щейъара атІ. Зе дадасра, бабасра цІае кунара атІ.


Ме сухІурдин хІуттесари атІая кІиркІа пунае дехІен щейъар.

Гьал ми хизанар ке ппара девлет хъаеттар вея гъа-ме хІуриъ. Фи чиппис кканхъечира, атІас лихъае мебури хІуттесар. Вари щейъар хъуная мебурихъ, амма фийицира гулуф суман ая мебурис чиппин хизанарин арайилас.

Фикир акъухІела кІиркІа, андавуь агвая мис чиппин хулаъ авалдин элхъе хъяси учин бабан, шатте юркІв учин дадан. Фийицира мебурин са фиттихъра ул хъадавай суман аеф, алгъузуна чиппин девлетарилла экъуна аеф суман ая агъай ми хизанар.

– Ваъ, – пуная ме кІиркІа – миштти хъастава. Зе-гъмет дадивуна фачархъу щейъари, шадвел ахай ада-вуй хизанарис.

Ушуная ме нецІун багуливди, гІихъуная ми хІуттесар хъеттагІди, адиная хаб хулади. Хъугулуная мебурин хулар, хазинаяр. Авалдин суман хъухъуная агъай мебурин хал. Амма ракакк кІиркІ адегуна, элхъенди баб гъузуная гьал.



Гјоран –хабар

Ая агъай даради са бицІи Гјор. Дар азманф э агъай. Даран багулив са нецІвра фая агъай. НецІун къирагъив са хъед гъузу мукъра фая агъай. Гъаги хъеттагІ гІая агІай ТураланкІуч.

Гјорас ухътанди агуная ме ТураланкІуч, пуная ми:

– Шаб захъай дусттвел акъас!

– Шаб, хъурай, – пуная ТураланкІуча.

Гъар ягъа вей хъуная Гјор ТураланкІучан багуди, акъай хъуная мис эхттилатар дарахъас. ТураланкІучала мис акъай хъуная лехъунар тич рудж гъударкай, мич кІил гъударкай.

Са ягъариккес, ягъа адиная Гјор нецІун багуди, агуная адавай мисаъ ТураланкІуч. Экъуна ая агъай нецІун багулив са Гјуб.

– Я, Гјуб, – пуная Гјора, – нахъуни гъамисаъ ае ТураланкІуч?

– Агундава зас, – пуная Гјубала, амма уч элхъенди фаттархъуная ме.

– Фас элхъенди аеф э вун? – пуна, хабар гъушуная Гјора.

– Фас ийчин ягІайва, – пуная Гјубала, – вас зун ягІардахъухІела! Зун гъати ТураланкІуч э!

– Дава! Дава! – пуная Гјора – Вахъ къацІ рудж хъудава!

– Зун хІа хьунаеф э, – пуная Губала. – ХІа хьухІе-
ла чин гьамишттинттар вееттар э.

Адина ГІюр хулади, суалар йиная ме учин бабас:

– Я, зе баб, муси зун хІавереф!

– Веси, веси, зе кІиркІ, – пуная баба.

– Хаб, хІа хьегуна фуш э закес вереф? – хабар гьу-
шуная ГІюра.

– Вакес батІар хІа ГІюр хьасе хье дад суман, – пу-
ная баба.

Кканхьуна ада ГІюрас илгос уч ае суманди. Ушу-
ная ме дараас тич батІарф айчуг акьас училас. Агуная
мис са арайилас ухьтан нахчир. Гьати нахчир суманф
хьуна ккандий пуна фикир акьуная ме.

– Фиши вун? – пуна, хабар гьушуная ме.

– Зун чІирин ПегІ э, – пуная нахчири.

– Фи ухьтанф э вун! Засра вун суманф хьуна ккан-
ди зун, – пуная ме.

Гьагистти агьай амий, унхьуная мис са туфангин
джил. Адина гІурчахъанди кІиная гьами чІирин Пегь,
бицІи ГІюр агунара адавуи мис. Гьишиная ГІюр гучІ
хьуна, гьалкканхьуна андавуи мис чІирин ПегІ хьас.

Агуная мис са арайилас Хаз. Пуная ме:

– Фи ухьтан рудж хъая вахъ Хаз, зусра кканди вун
суманф вес! ЯгІар акье зус фи ийчин вун акьаеф?

– Зун пустталаяр завал акьаеф э кьюрдис! Рукъкъас
акьуна хаб зе мугуди гьас. Дахьучи гашила вереф э
кьюрдана! – пуна, жуваб йиная Хазала.

Фикир акьуная ГІюра, фикьас э пуна ппара зегьмет
диваф Хазала суман. Кканхьуна ада мис учикес Хаз
хьуна. Ппара руцуная ми ГІюр дараъ, амма са вахІши

хІейванна мис бегемиш хьуна адавуй. ІУл бицІиф э пуная, КІедибан усаф э пуная, Багниш Іурд идехилди гъархьаф э пуная. Са чІалалди, са фушра кканхьуна адава ГІюрас.

Гъар ягъа фикир акъай хьуная ГІюра, фуш ийчин учикес вереф. Фикирдик кий аттархьуная ме са ягъа гъаме нецІун багу. Сад пуна унихьуная мис хьеттан джил. Хъадурфуная ме, агуная учигъас гучІ хьуна хьеттагІ гІачишинае ГІуб. ЯгІар хьуная ГІурас ме ГІуб.

– Фас гучІ хъефе вас? – пуна, хабар гъушуная ме.

– Вун фуше? – пуна, суал йиная ГІуба.

– Зун гъати ГІюр э, – пуна, элхъюная ГІюр.

– Вуй, – пуная ГІуба, – зас вун ягІар хьунда! ФидехІен батІар ГІюр хьуная вакес!


Шад хьуная ГІюр, ГІуба гишттин чІалар пухъела, гъуккай ушуная ме хулади.

Хабар гъушуная ме учин бабафас:

– Зун батІарф хьуна ава зе дад суман?

– Ая, бабан, – пуная баба. – Лекар цІуппе хьуная ве, улар хІа хьуная ве, ибурар ирхе хьуная, чІичІра са шюрге хьуная!

Шад хьуна, шад хьуна лехъунар акъуная ГІюра.



Ягънакъкъчи къари

Фушар ийчин гIаеф

**Агъа инсан. Ахаф.
Къуджа – Сукъкъур-Сулейман
Къари – Тук-Халум (Хабар-Халум)
Хан – Хан
Хумбар
Халкъар**

1-тIушуб.

*Агъуларин са хIур.
Хал Сукъкъур-Сулейманан.*

Ахаф.

– Че хІури са хьир хьунай
Дуйин хабарар кканеф,
Че хІури са хьир хьунай
Агуф-дагуф пас кканеф.

Гидин ттур ий Тук-Халум,
Амма варий агъайий
Гъагидис Хабар-Халум
Чиппи-чиппин арайил.

Хабар-Халумахъ хъай къуджа
Са улис дала дагваф.
Хабар-Халумахъ хъай къуджа
Сукъкъур-Сулейман агъаф.

ТІушуні хье Сулейман дарасти
КІурар ахас.
ТІушуні Хабар-Халум кючайсти
Ягънакъкъ атас.

2-тІушуб. Дар. КІанчІ.

Къуджа.

– Гъами кІанчІ фи иджеф э!
ГатІилилди агъдивас!
Агъдивуна ахаси
Іурдана пичи икІас.

Ме фи э! Я, инсанар!!!
Гъамиса сундукъ ая!!!
Гъала? Мей гІаламатар!
Къизилар, арсар ая!

Фиштти акъай сундукъис
Са ул ада сукъкъури?
Агучи зе Халумас
Архъаси хабар хІури!

Акъас гъала мисал ишан –
МучІинахъди хІяхъархъас.
Хабар-Халумас акъас гІамал –
Зун балайри адархъас.

Ракъкъяри ахъаси нисар.
Сара фи вей къуцури?
КІурарикк китІаси цІуркІар
Сара фикъа? Сукъкъури.

З-тІушуб.

Хал. ТІагариас хъадурфая къари.

Къуджа.

– Я, Тук-Халум, шав гъала
Къизилдин сундукъ ахас.
СачІукъ тагІди ухъ гъала
Инсанарис хъин дагвас.

Рекъкъ.

Къари.

– Я, къуджа, хье рекъкъери
Жагварди нисар ая!

Къуджа.

– Бикъюна руц зе къари
Накъ нисан угъал аяй!

Къари.

– Я, къуджа, хье дарарик
КитІуна цІуркІар кия!

Къуджа.

– Бикъюна руц зе къари
ЦІуркІарин угъал аяй!

Къари.

– ЦІуппиди фаце кучІар
Къизилар ладахъурай

Къуджа.

– Сайисра магъа гъа чІалар
Хъин балай адархъурай!

Унихъая хІучарин джилар.

Къари.

– Гъарай, къуджа, хІучар а
Хъин гІутІаси гъагури!

Къуджа.

– Гъаги гІашае Хан э
Кут ицІай джинарари!

Ушуни хулади. IУш.

4-тIушуб. Багаймикес.

– Ку-ка-ре-ку! – 2 гелай.

Аттадини къари, агвая мис хумбар

Къари.

– Я, ччиччар, ккане ччиччар!

ГIуши чин дараъ аяй.

Сайисра хъамагъа ччиччар,

Къизилдин сундукъ аяй!

Хумбарира хъупуни

– Я, ччиччар, ккане ччиччар!

ГIуши гур дараъ аяй. – 2 гелай.

– Сайисра хъамагъа ччиччар

Къизилдин сундукъ аяй!

5-тIушуб. Хандин хула.

Хан.

– Зун гъами хIурин Хани!

Фас акъуфи джинди кар?

Чвехъ хъархъуф гъел са къани

ИцIаси батIарди дар!

Къари.

– Джин акъастта са фера.

Файинай чин къизилар!

Къуджа.

– Агуфтта зус са фера.
Макъа къари гѳамалар!

Хан.

– Уп Тук-Халум, мус ийчин
Фачархъундеф къизилар!?

Къари.

– Ушунай дара мучѳе
Угъухѳела угъалар.
Нисан угъал угъунай –
Жагор хъунайи рекъкъер.
Цѳуркѳарин угъал хъунай –
Дарак ккецѳунай цѳуркѳар.

Къуджа.

– Макъа къари гѳамалар –
Вун кумеѳи агъаси!
Мусий угъуф угъалар?
Вун далу э агъаси!

Къари.

– Гъати гѳуши був атай
Ун ккетѳунай дараритъ.
Джинарари кут ицѳай
Хан гѳашай ай раккари.

Хан.

– Кут гъел вас ицІаси чин,
Фи гІамалар акъайчин!
Нач гІада сурат учин,
Тук-Халум, ГІамал-Халум!


Халкъ.

– Кут гъел вас ицІаси чин,
Фи гІамалар акъайчин!
Нач гІада сурат учин,
Тук-Халум, ГІамал-Халум!

Къарихъ хъихъиная мебур.

Къуджа.

– Къизилар зус илгуни
Идже хъуни зе курар!
Къарин сивра бикъюни
Вейчин хъупурай чІалар!



Сифттан чІал

ШАГЫРАР

Школьникдис	6
Хье хІукумат.....	7
Школьникарис	7
Зе Агъул.....	8
Хьид адини.....	9
МагІалимар.....	9
ДахІал	10
ГІюл.....	11
Гъамиштти хъурай	12
Цул адини	12
Ватан	13
Угъал	14
Аяз – ХІядад	15
Хьид	16
ГІуш.....	16
ГІюлана	17
Якбу чи	18

ЭХТТИЛАТАР, ХИКАЯТАР

КІур-кІур	20
Балугъбай.....	21
ІУлна Чаркв	23
ГІубахъан	26
Багниш.....	28
Кролик на ГІюр	30
Са Паччагъихъас.....	31
ХІабабна хуттул.....	33
КантІна Капур.....	35
Дагийхъас.....	36
ЦІив-цІивай	37
Урч	41
КІарни.....	42
ХІуни	45
Пул	46
Рагъухъандин хІуттесар	48
ГІюран –хабар	50

ПЬЕСА

Ягънакъкъчи къари	54
-------------------------	----

Гури Рамазановна Рахманова

РОДНИК

На агульском языке

Редактор *Н. Исрафилов*

Художник *Р. Темирова*

Художественный редактор *М. Левченко*

Технический редактор *В. Гаджиева*

Лицензия ИД 05334 от 10.07.01

Подписано в печать 12.08.2020.

Формат 70x100¹/₁₆. Бумага мелованная.

Гарнитура «SchoolBookC». Печать офсетная.

Уч.-изд. л. 3,1. Усл. печ. л. 5,2.

Тираж 300 экз. Заказ 590

Цена свободная

ГАУ РД «Дагестанское книжное издательство»

Министерства информатизации, связи и
массовых коммуникаций РД,

367000, г. Махачкала, ул. Пушкина, 6.

Отпечатано в ООО «Издательство «Лотос»,
367018, РД, г. Махачкала, пр. Петра I, 61